

# Huet

## I.

A grant tort me fet languir  
Amors, qu'ainc ne soi trichier:  
Ains la ser sens repentir  
De fin cuer loial, entier.  
Bien me devoit otrier  
De ma dame un dous baisier,  
Por alegier,  
Que sens li ne puis avoir confort.  
Amors, a grand tort  
Volez ma mort.

## II.

Douce riens, cui tant desir,  
Ne me sai ou consellier;  
Mes tant me plest a sofrir  
Li maus, dont merci vos quier,  
Que ne m'en puis aloignier,  
Mes por Dieu vos vueil prier  
De moi aidier,  
Que sens vos ne puis avoir confort.  
*Amors etc.*

## III.

Las! quant son gent cors remir  
Bien vueil estre en son dangier  
Si me plest mout obeïr  
Solement dou desirier.  
Pas ne se doit aloignier  
Fins amanz, que de legier  
Puet avancier;  
Qu'en loiauté doit avoir confort.  
*Amors etc.*

## IV.

Deus! que porai devenir,  
Quant tot le mont l'oi prisier!  
N'onques ne poi tant servir  
Qu'a merci puisse aproichier;  
Quant plus l'aim, et moins m'a chier.  
S'Amors ne fraint son cuer fier,  
Ce n'a mestier

Qu'en mon vivant puisse avoir confort.  
Amors *etc.*

V.  
Faus felon et losengier,  
Qui nos vuelent abessier  
Par lor plaidier;  
Mais ço n'iert ja se pitiez ne dort.  
Amors *etc.*

- letto 504 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/huet>